

Tschierv a Ramosch n'aveva betg tuberculosa

Dumonda Niggli-Mathis davart la malsogna tar selvaschina

■ (anr/fa) Ils ultims onns han ins constatà pli e pli cas da tuberculosa tar ils tschiervs en il Vorarlberg vischin. L'ultim temp ha i dà en Engiadina Bassa ed en il Partenz contacts da selvaschina cun muvel.

Ils onns 1950/60 era il tema tuberculosa tar muvel da niz actual en Svizra. Dapi bundant 50 onns però è la Svizra libra da tuberculosa, tant tar il muvel da niz sco era tar la selvaschina. Perquai ha la nova ch'i dat cas da tuberculosa tar tschiervs en il Vorarlberg alarmà ils purs en las regiuns cunfinantas Signuradi, Partenz ed Engiadina Bassa. Il deputà *Bernhard Niggli-Mathis* (pbd, Aschera) è daventà activ, «er perquai che la tuberculosa è privlusa er per l'uman», ed ha inoltrà ina dumonda: «Cunquai ch'ils tschiervs da nossas vals al cunfin tscherrgan lur quartier da stad er en las vals dal Vorarlberg e turnan d'enviern enavos tar nus exista il privel ch'els importian questa malsogna en Grischun», ha el constatà e dumandà tge che la regenza e l'uffizi per la segirezza da victualias e per la sanadad d'animals (USVA) hajan fatg en chaussa.

Duas ulteriuras dumondas da Niggli-Mathis

Dapi l'onn 2013 lavura il chantun cun in program da surveglianza per identifitgar a temp la tuberculosa. Durant tut l'onn prenda l'USVA emprovas da controlla da tschiervs ed autra selvaschina disgraziada u schluppettata durant la chatscha e la chatscha posteriura. «Fin uss n'è vegnì constatà nagin cas da tuberculosa», aveva la regenza respundì a Niggli-Mathis. E per che quai restia uschia exista dapi l'atun 2016 in scumond da pavlar selvaschina d'ungla en las vischnancas da l'Engiadina Bassa, il Partenz ed il Signu-



Il deputà *Bernhard Niggli-Mathis* dad Aschera è s'occupà dal privel da tuberculosa per il muvel en contact cun la selvaschina.

MAD

radi. Mardi ha tractà il cussegl grond la dumonda Niggli-Mathis. Il deputà ha menziunà ils films sin mediums socials da tschiervs en stretg contact cun animals da niz, p. ex. a Ramosch u a Claustra, e fatg duas ulteriuras dumondas a cusseglier guvernativ *Jon Domenic Parolini*: «Tgenins products agriculs or da las regiuns pertutgadas da la tuberculosa vegnan scumandadas? Vegnan sancziunadas singulas purarias u regiuns entiras?»

Perdits finanzialas per ils purs

Il cusseglier guvernativ Parolini ha ditg che tut las mesiras che vegnian decretadas sa basian sin la lescha federala davart epidemias d'animals. «Siond ch'ils umans survegnan la malsogna surtut sch'els bavian latg frestg d'ina vatga infectada èsi scumandà als purs durant 40 fin 60 dis da vender il latg da vatgas che pudessan avoir la malsogna.» Per il cas dad epide-

mias vala quest scumond pli ditg: Suentter 60 dis vegn fatg in emprim test e 40 dis pli tard in segund. Sche quels èn omadus negativs po il pur puspè vender il latg. «Quai signifitga 100 fin 120 dis, in terz d'in onn, ch'il pur na po betg far ils affars sco usità», ha ditg il cusseglier guvernativ, «damai ina gronda perdita finanziala.» A la segunda dumonda ha'l respus ch'i vegnian sancziunadas singulas purarias e betg regiuns entiras. Causa ch'ins ha constatà a Claustra ed a Ramosch contacts intensivs da tschiervs e muvel da niz ha la guardia da selvaschina schluppettata quests tschiervs e laschà analizar las emprovas d'in labor spezialisà a Turitg. «Tuttas duas provas èn negativas, uschia ch'il latg da quellas purarias po puspè vegnir consumà er senza al coier l'emprim.» Il cusseglier guvernativ ha constatà ch'il scumond da pavlar la selvaschina vegnia en general respectà bain en Engiadina Bassa e Partenz.